

DOMENIE VII DI PASCHE

Antifone di jentrade cf. Sal 26,7-9

Scolte, Signôr, la vôs dal gno berli.
Il gno cûr a ti ti fevele, ti cîr la mê muse.
La tô muse, Signôr, o voi cirintle.
No sta platâmi alore la tô muse, aleluia.

Si dîs Glorie a Diu.

Colete

Signôr, scolte ben disponût lis nestrîs preieris
par che il Salvadôr de gjernazie umane,
che par fede o crodìn te glorie de tô maiestât,
nus fasi sintî che al è presint framieç di nô fin a la fin dal mont
come che lui stes nus à imprometût.
Lui che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 7,55-60

O viôt il Fi dal om in pîts a la diestre di Diu.

Dai Ats dai Apuestui

In chei dîs, Stiefin, plen di Spirtu Sant, al cjalà sù fis viers il cîl e al viodè la glorie di Diu e Jesù in pîts a la sô diestre. Alorè al disè: «O viôt i cîi spalancâts e il Fi dal om in pîts a la diestre di Diu». Petant grancj berlis, si stroparin lis orelis e si butarin intor di lui; lu sburtarin fûr de citât e si meterin a clapadâlu. I testimonis a poiarin i lôr vistîts dapît di un zovin di non Saul. E intant che lu claponavin, Stiefin al preave cussì: «Signôr Jesù, cjol la mê anime». Po si pleà sui zenoi e al disè a fuart: «Signôr, no sta metiur in cont chest pecjât». E cun chestis peraulis, si indurmidì vie. Peraule di Diu.

SALM RESPONSORIÂL dal Salm 96

R. Danus vôi, Signôr, par viodi la tô glorie.

O ben:

R. Aleluia, aleluia, aleluia.

Il Signôr al regne! Che e gjoldi la tiere,
che si indalegrin dutis lis isulis.
Nûl e scûr lu invulucin,
justizie e dirit a son il çocul de sô sente. **R.**

I cîi a contin la sô justizie
e ducj i popui a restin pe sô glorie.
I dius a son ducj inzenoglâts denant di lui. **R.**

Tu sês tu, Signôr, l'Altissim sun dute la tiere,
puartât cetant di plui di ducj i dius. **R.**

SECONDE LETURE Ap 22,12-14.16-17.20

Ven, Signôr Jesù!

Dal libri de Apocalîs di san Zuan apuestul

Jo, Zuan o ài sintût une vôs che mi diseve: «Ve, o vignarai in curt e o puartarai daûrmi il gno mercedi, par dâi a ognidun seont lis sôs voris. Jo o soi l'Alfa e l'Omega, il Prin e l'Ultin, il Principi

e la Fin. Furtunâts chei che a lavin i lôr vistûts: a varan part dal arbul de vite e a podaran jentrâ te citât pes puartis. Jo, Jesù, o ài mandât il gno agnul par testimonêus a vualtris chestis robis in merit des glesiis. Jo o soi la lidrîs de çocje di David, la stele sflandorose de buinore».

Il Spirt e la nuvice a disin: «Ven!». E chel che al scolte, che al torni a dî: «Ven!». Chel che al à sêt, che al vegni; chel che al vûl, che al urissi dibant l'aghe de vite.

Chel che al garantîs chestis robis, al dîs: «Propit, o vignarai in curt!». Amen. Ven, Signôr Jesù.

La gracie dal Signôr Jesù che e sedi cun ducj vualtris. Amen.

Peraule di Diu.

CJANT AL VANZELI cf. Zn 14,18; 16,22

R. Aleluia, aleluia.

No us lassarai vuarfins,
al dîs il Signôr,
o tornarai di vualtris
e il vuestri cûr al sarà plen di gjonde.

R. Aleluia.

VANZELI Zn 17,20-26

Che ducj a sedin un.

Dal vanzeli seont Zuan

In chêt volte, Jesù alçant i vôi viers dal cîl al preà cussì: «Pari sant, no prei dome par chei chi, ma ancje par chei che a crodaran in me in gracie de lôr peraule; che ducj a sedin un, come tu, Pari, in me e jo in te, par che a sedin ancje lôr in nô, di mût che il mont al cognossi che tu mi âs mandât tu. E jo ur ài dade a lôr la glorie che tu mi vevis dade a mi, par che a sedin un come che ancje nô o sin un: jo in lôr e tu in me, par che a sedin refinîts te unitât, e il mont al ricognossi che tu tu mi âs mandât me e che tu ur âs volût ben come che tu mi âs volût ben a mi. Pari, chei che tu mi âs dât a mi, o vuei che là che o soi jo a sedin ancje lôr dutun cun me, par che a contemplin la mê glorie che tu mi âs dade, parcè che tu mi âs volût ben ancjemò prime de creazion dal mont.

Pari just, se il mont no ti à cognossût, jo invezit ti à cognossût e chei chi a àn ricognossût che tu mi âs mandât tu. E jo ur ài fat cognossi il to non e o continuerai a fâural cognossi, par che il bonvolê che tu âs vût par me al sedi in lôr e jo in lôr».

Peraule dal Signôr.

Si dîs O crôt.

Su lis ufiertis

Acete, Signôr, lis preieris dai fedêi
dutune cu l'ufierte dal sacrifici,
par che, in gracie di chest at di sante religjon,
o podìn rivâ a la glorie dal cîl.
Par Crist nestri Signôr.

Antifone a la comunion Zn 17,22

Ti prei, Pari, che a sedin un,
come che o sin un ancje nô, aleluia.

Daspò de comunion

Scoltinus, Diu, nestri Salvadôr,
par che midiant di chescj sacrisants misteris
o podìn sperâ che in dut il cuarp de Glesie
si colmi ce che i à za sucedût al so cjâf.

Par Crist nestri Signôr.